

1 John

Roube'aten Ana Tur

John ana fef kikirum ana not gagamih i rou'ab. Ana baiyabayah sabuw koufair nitih saise God Natun Jesu Keriso ana baita'ayomaim hinama, naatu sabuw baifufuwenayah boro hinan baifuwen turamaim hini'obaiyih hai baita'ay hinagugurus isan i ebimatnuwih. Anayabin iti bai'obaiyenayah boro sabuw hinifufuwih, God Natun i boro orot babin biyahine nan, naatu yawas bain isan tafaram ana sawar inakwahiren. Baitumatum itinin anababatun i taituwa iniyabuwh, anayabin God i yabow naatu i ana sabuw i esisinafube hinasinaf. Anayabin yabowamaim kakafin boro inawasatan, men taituwat akisih isah taniyabow baise Jesu Keriso auman tanitumitum. Anayabin i God Natun naatu God ana Roubinen orot naatu Keriso i anababatun it isat morob.

Fef wanawanan tur iti na'atube hi'asgidigid

Roube'aten ana tur (1.1-4)

Marakaw naatu gugumin (1.5-2.29)

God natunatun naatu Demon natunatun (3.1-24)

Turobe naatu baifuwen (4.1-6)

Yabow ana bowabow (4.7-21)

Wastanen ana baitumatum (5.1-21)

Yawas Ana Tur

1 ¹“Yawas ana tur anamaim ma'am na tit a'itin, matai yan a'itin biyan abutubun naatu eo fanan anowar. ² ^bIti yawas na birerereb i aki a'itin, imih aorereb kwa a tur ao'owen, iti yawas wanatowan i Tamat God hairi hima'am na aki isai irerereb. ³ Abisa a'itin anonowar, i ao'orereb kwa auman kwananowar, saise aki Tamat Natun Jesu Keriso bairi abita'ayomaim kwanarun kwanikofani

^a 1.1 Jn 1.1 ^b 1.2 Jn 1.14

tanita'ay. ⁴ ^cIti tur akikirum saise aki ai yasisir nan yomanin na'asa'ub.

God I Marakaw

⁵ ^dTur God Natun biyanane anonowar i iti ao'orereb kwananowar. God i marakaw, i biyanamaim men kafai'imo gugumin ta ema'ama'amih. ⁶ ^eAwatamaim ta'orereb it i God bairi tabita'ay, baise ata yawasamaim^f i gugumin wanawanan tama'am,^g it i baifuwenayah naatu men turobe'emaim tama'am. ⁷ Baise i marakawinamaim ema'am na'atube it marakawinamaim tanama'am, boro taituwat bairi tanita'ay gewas, naatu i Natun Jesu Keriso ana rara'amaim ata bowabow kakafih etei boro nakusouwen.

⁸ ^hIt aurit bowabow kakafih en tanarouw tanayayaub, i taiyuwit tabifufuwit naatu wanawanat men turobe ema'am. ⁹ Baise God matanamaim ata bowabow kakafih tana'e'en i boro ana omatanen nakaif gewasin nasinaf, ata kakafih boro nanotawiyen naatu ata sinaf kakafihine boro nakusouwit. ¹⁰ Baise it aurit bowabow kakafih en tanarouw tanao'o na'at, nati i tasinaf God baifufuwenayan emamatar. Naatu i ana tur wanawanatamaim ana efan men ema'am.

Keriso Ata Baiywasenayan

2 ¹ ⁱNatunatu ayu iti fef akikirum, saise kwa bowabow kakafih men kwanasinafumih. Baise o yait bowabow kakafin inasisinaf na'at, Jesu Keriso ana Yawas Mutufurin Tamat nanamaim wasfagarit ebatabat boro nibaisit Tamah nifefeyan. ² ^jI akisinamo biyan siboromih yai ata bowabow kakafih etei notawiyen, men it akisit baise tafaram wanawanan sabuw tutufin etei hai bowabow kakafin auman notawiyen.

³ God ana ofafar tanabobosiyasiyar na'at, nati i ebiturobe it i anababatun God taso'ob. ⁴ Naatu orot ta nao, "Ayu i God aso'ob," baise ana ofafar men nabobosiyasiyar, nati orot i baifufuwenayan, dogoron wanawanan men turobe ema'am. ⁵ ^kBaise orot yait God ana tur nabobosiyasiyar, God ana yabow nati orot wanawanan i rusouw, nati'imaim boro tanaso'ob it i anababatun God nowan. ⁶ Orot yait Keriso wanawananamaim ma narouw nao'o, gewasin nati orot i Jesu Keriso ma'ama'abe nama.

^c 1.4 Jn 16.24 ^d 1.5 1Tim 6.16; Jas 1.17 ^e 1.6 1Jn 2.4 ^f 1.6 ata remoramaim

^g 1.6 tareremor ^h 1.8-9 Psa 32.5; Pro 28.13 ⁱ 2.1 Heb 7.25-26 ^j 2.2 Jn 1.29; Col 1.20; 1Jn 4.10 ^k 2.5-6 Jn 14.21, 23

Ofafar Boubun

⁷^lAre au ofonah, iti obaiyunen tur kwa isa akikirum i men boubun. Baise atamanin marasika ana tur hio kwanowaraka.

⁸^mBaise boun i obaiyunen boubun kwa isa akikirum, tur anababatun i Keriso wanawanamaim hi'itin naatu boun kwa auman wanawanamaim ti'i'itin, anayabin gugumin i au'uf enan naatu marakaw anababatun i busurufika ekukusisiar. ⁹ⁿOrot yait marakawinamaim ma rouw eo baise taituwan ebifa'ifai, nati orot i boro'ika guguminamaim ema'am. ¹⁰^oOrot yait taituwan ebiyabuw marakawinamaim ema'am, naatu i wanawanamaim boro men orot babin ta nabonawiy kakafin nasinafumih. ¹¹^pBaise orot yait taintuwan ebifa'ifa'ih i guguminamaim ema'am naatu guguminamaim ereremor, i men so'ob menamaim enan. Anayabin gugumin kakafin iwa'an ebobogan.

¹²Natunatu kwa isa iti fef akikirum,
anayabin Keriso ana sinafumaim kwa a bowabow kakafih etei notawiyen.

¹³Tamai'inah kwa isa fef akikirum,
anayabin tafaram anamaim God ma'am i kwaso'ob.
Kwa orot boub isa akikirum,
anayabin demon mowan kwarab re kwawasatan.

¹⁴Natunatu kwa isa akikirum,
anayabin Tamat kwaso'ob,
tamai'inah kwa isa akikirum,
anayabin tafaram anamaim God ma'am kwaso'ob.
Naatu kwa orot boub is akikirum,
anayabin kwa orot fair,
God ana tur wanawanamaim ema'am
imih Demon Mowan kwarab re kwawasatan.

¹⁵^qTafaram isan men kwaniyabow, na'atube tafaram ana sawar auman men isah kwaniyabow. Baise tafaram isan kwanabiyabow, Tamat i men kwabiyabuwimih. ¹⁶^rSawar tutufin etei i tafaram nowan, abis sabuw hi'itah tekokok, naatu akisih hai kokomaim tisinaf kakafin emamatar. Imih tafaramamaim sawar iti sabuw hi'itah hai bai'o'orot erara'at. Baise sawar iti i men Tamatane enanamih iti i tafaram mowan. ¹⁷^sTafaram wanawanan ana sawar sabuw tekokok etei boro hini'en. Baise orot yait God ana kok esisinaf boro nama wanatowan.

¹ 2.7 Jn 13.34; 2Jn 5-6 ^m 2.8 Jn 1.9; Rom 13.12 ⁿ 2.9 1Jn 4.20 ^o 2.10 Rom 14.13

^p 2.11 Jn 12.35 ^q 2.15 Rom 8.7 ^r 2.16 Rom 13.14 ^s 2.17 Mat 7.21

Keriso Ana Kamabiy

¹⁸ Natunatu tafaram ana yomanin i na kabom, hio kwanowar Keriso ana kamabiy i boro nan, imih Keriso ana kamabiy mounurh maiyow iban boun hina hititaka. Imih itaban iti'ima im taso'ob mar yomanin i nakabom. ¹⁹ Iti sabuw i it ata kou'ay turin rowenatait tit, imih it taso'obaka nati sabuw i men it nowat anababatun. Anayabin it nowat na'at boro bairit tatama, baise hibihamiyitamaim it ebi'obiyyit nati sabuw i men it nowat anababatun. ²⁰ Baise kwa i Anun Kakafiyin Keriso tafa yan isuwai re, imih kwa etei tur anababatun kwaso'ob. ²¹ Ayu kwa isa fef akikirum i men kwa tur anababatun so'oba'e kwama'am anot akikirumamih, en. Baise nati i kwa kwaso'obaka, naatu tur anababatunane boro men baifuwen ta nanamih, nati auman i kwa kwaso'obaka. ²² Imih yait i baifufuwenayan? Orot yait nao Keriso i men Roubininenayan orotomih? Nati orot i Keriso ana kamabiy wairafin. Tamat God Natun hairi eyayaubih. ²³ Anayabin orot yait God Natun eyayaub, Tamah auman eyayaub. Baise orot yait God Natun ebaib Tamah auman boro nab.

²⁴ Imih kwana'itin tur marasika kwanonowar kwanakaif gewas dogoromaim nama. Tur kwanakaif gewas kwa boro mar etei Jesu wanawananamaim kwanama naatu Tamah auman boro wanawanamaim nama. ²⁵ Anayabin Jesu sawar ta baititamih eo'omatani i yawas wanatowan boro nitit. ²⁶ Ayu kwa isa iti fef akikirum i kwa abimatnuwi sabuw iyab hina kwa tibifufuwi isan. ²⁷ Baise kwa tafamaim Keriso Anunin Kakafiyin isuwai re'ere i ema'am. Imih kwa boro men yait ta ni'obaiyimih. Anayabin Anun Kakafiyin sawar etei ebi'obaiyi i turobe, men ta baifuwenamih. Imih abisa Anun kakafiyin ebi'obaiyi i kwanabosiyasiyar Keriso wanawananamaim kwanama.

²⁸ Natunatu Keriso wanawananamaim mar etei kwanama, saise i nabirerereb ana vey a it boro koufair auman tanatit, naatu boro men tanibiya'ohow tanawa'iramih.

²⁹ Kwa etei kwaso'ob Keriso ana ef i mutufor, imih orot yait ef mutufor esisinaf kwanaso'ob nati orot i Godane tufuw maiye.

God Natunatun

3 ¹ God ana yabow it isat rara'at kwana'itin, ana yabow it isat ra'at, imih God it natunatun rouw ea'afit. It i anababatun God natunatunamih tamatar. Imih iti tafaram ana sabuw men hisu'ubit,

^t 2.18 Mat 24.5, 24; 2Jn 7 ^u 2.19 Act 20.30 ^v 2.20 1Cor 2.15; 2Cor 1.21; 2Jn 2

^w 2.22 1Jn 4.3; 2Jn 7 ^x 2.23 Jn 5.23; 1Jn 4.15; 5.1 ^y 2.27 Jn 16.13 ^z 2.29 1Jn 3.10

^a 3.1 Jn 1.12-13; 16.3

na'atube God auman men hisu'ub. ^{2b}Are au ofonah, it i boun God natunatun tamatar. Baise men isat ibebeyan taso'ob gewas abisa boro isat namatar. Baise Keriso nanan ana vey'a'maim it taso'ob, it boro i ana itininabe. Anayabin boro matatyan ana itinin mi'itube boro i na'atube tana'itin. ³Isan imih sabuw iyab tibitumatum Keriso boro namatabir maiye, taiyuwih hinaya'asairih dogoroh sasouwin hinama Keriso na'atube.

⁴Orot yait bowabow kakafin esisinaf, i God ana ofafar ea'astu'ub, imih ana ubar boro nab. Anayabin bowabow kakafinamaim ofafar ea'astu'ub. ^{5c}Keriso ra'iy ata bowabow kakafih bobosairen i kwaso'ob, i aurin i kakafin en. ⁶Imih sabuw iyab Keriso bairi tema'am boro men matan fufur bowabow kakafin hinasinafumih. Baise sabuw iyab matan fufur bowabow kakafin tisisinaf, anayabin Keriso men hi'itin o men hisu'ub.

⁷Natunatu sabuw men hinikubibiruwi, orot yait ef gewasin esisinaf i ana ef gewasin, Keriso ana ef gewasin na'atube. ^{8d}Orot yait matanfufur bowabow kakafin esisinaf i Demon natun. Anayabin Demon Mowan aneika bowabow kakafin sinaf. Imih God Natun re'er anayabin i abisa Demon biwa'an i gurusinamih raiy. ^{9e}Orot yait God Natun, i boro men matanfufur bowabow kakafin nasinafumih. Anayabin God naniyan anababatun i nati orot yan wanawanan ema'am. Imih boro men mar etei bowabow kakafin nasinaf, yabin i Tamah God. ¹⁰Imih God natunatun naatu Demon natunatun hai itinin i bebeyan ta'itin. Orot yait men ef gewasin esisinaf, o tain men ebiyabuw nati orot i men God natunamih.

Kwaniyabowbonen

¹¹Tur aneika hiorereb kwanonowar i baiyabowbonen isan hio. ^{12g}It men Cain na'atube tanasinafumih, anayabin i demon nowan. Aisim tain easabun? Anayabin abisa sisinaf i kakafin, baise tain ana ef i mutufurin, imih men Cain sisinafube kwanasinafumih. ^{13h}Taitu, iti tafaram ana sabuw hinabifa'ifai men kwanakasiyomih. ¹⁴ⁱAki aso'ob morob ainsnowah arabon yawas ana efamaim abatabat, anayabin taiti abiyabuwh. Orot yait men ebiyabow i morob ana efanika ema'am. ^{15j}Orot yait tain ebifa'ifai i farumayan na'atube imih nati farumayan aurin yawas wanatowan wanawananamaim men ema'am.

^{16k}Yabow ana ef aki iti'imaim aso'ob. Keriso ana yawas it isat i'inuw, imih it auman taituwat isah ata yawas tani'inuw. ^{17l}Orot sawar wairafin tain itin ebi'akir baise baibaisin isan men ekokok, nati orot aurin God ana

^b 3.2 2Cor 3.18 ^c 3.5 Jn 1.29; 1Pet 2.22-24; 1Jn 2.2 ^d 3.8 Jn 8.44 ^e 3.9 1Jn 5.18

^f 3.11 Jn 13.34 ^g 3.12 Gen 4.8 ^h 3.13 Jn 5.18-19 ⁱ 3.14 Jn 5.24 ^j 3.15 Rev 21.8

^k 3.16 Jn 13.1; Gal 1.4 ^l 3.17 Deu 15.7

yabow men ema'am. ¹⁸ *m*Natunatu yabow i men turawat namomon. Baise yabow i turobe ana itinin auman, saise yabow turobe namatar.

Koufair God Nanamaim

¹⁹ Ef iti'imaim it boro tanaso'ob it i anababatun turobe nowan. Naatu God nanamaim boro koufair tanab tanabat. ²⁰ It dogorot wanawanan abisa kakafin esisinaf boro tanaso'ob, baise God i ra'at dogorot ata naniyan nasair. Imih abisa kakafin tasisinaf etei i so'ob.

²¹ *n*Isan imih au ofonah, dogorot ana naniyan men nabi'afiyit, God nanamaim boro koufair tanab. Naatu abisa takokok isan yoyobanamaim tanifefeyan boro nitit. ²² Abisa isan tanifefeyan boro tanab, anayabin ana ofafar tabobosiyasiyar, naatu abisa tasisinaf i yan esisisir. ²³ *e*Naatu iti i ana obaiyunen tur, Natun Jesu Keriso wabinamaim tanitumatum naatu taniyabowbonen, iyunit eo na'atube. ²⁴ *p*Sabuw iyab God ana ofafar tebobosiyasiyar, God i wanawanahimaim ema'am, na'atube i wanawananamaim tema'am. Anayabin aki God Anun Kakafiyin biti'imaim a so'ob, God aki wanawananamaim ema'am.

Tur Obe Anunin Kakafiyin Naatu Baifufuwenayan

4 ¹ *q*Are au ofonah, sabuw etei Anun Kakafiyin bain hinarouw hinao men kwanitutumih, baise wantoro'ot kwanafufunih kwana'itin, turobe i God biyanane Anun Kakafiyin hibai ai en. Anayabin dinab baifufuwenayah moumurih maiyow hitit tafaram awan karatan. ² *r*Ef i boro iti na'atube kwana'itin kwanaso'ob, nati sabuw i Anun Kakafiyin hibai ai en. Sabuw iyab hina'orereb Jesu i turobe Keriso, naatu orot babin biyah bai. Nati sabuw i turobe Anun Kakafiyin hibai. ³ *s*Baise sabuw iyab hina'orereb Jesu i men Godane na, nati sabuw i men Anun Kakafiyin hibaimih. Baise Keriso ana kamabiy orot anunin hibai. Marasika hio kwanowar Keriso ana kamabiy wairafin i boro nan, naatu boun i na tafaram wanawananamaim titaka.

⁴ *t*Baise natunatu, kwa i Tamat God nowan, dinab kakafih Keriso isan hibirakit kwawastanih. Anayabin Anun Kakafiyin wanawanamaim ema'am ana fair i ra'at. Tur anababatun ebi'obaiyi, men sabuw iyab iti tafaram ana wagabur hibow tema'am hai fair na'atube'emih. ⁵ *u*Dinab baifufuwenayah tafaramamaim abisa temamatar isah tibidudur, sabuw iyab iti tafaram nowan tenonowar. Anayabin nati sabuw i tafaram nowan. ⁶ Baise iti i God nowan, imih sabuw iyab God hisoso'ob, abisa tao boro hinanowar. Sabuw iyab men God nowan, abisa tao

^m 3.18 Jas 2.15-16 ⁿ 3.21 Heb 4.16 ^o 3.23 Jn 6.29; 13.34 ^p 3.24 1Jn 4.13 ^q 4.1 Mat 7.15; 1Th 5.21; 1Jn 2.18; 2Jn 7 ^r 4.2 1Cor 12.3 ^s 4.3 1Jn 2.18 ^t 4.4 Mat 12.29; 1Jn 5.4-5 ^u 4.5-6 Jn 8.47; 15.19

boro men hinanowar. Hai itinin boro iti'imaim tana'itan tana'inanih, menatan i turobe Anun Kakafiyinane enan, naatu menatan i wagabur baifufuwenayanane enan.

God I Yabow

⁷Are au ofonah, akokok taniyabowbonen, anayabin yabow i Godane enan. Orot babin yait ebiyabow, i God nowan naatu God su'ub. ⁸Anayabin God i yabow wairafin, imih orot babin yait men ebiyabow, i God men su'ub. ⁹God ana yabow it i'obaiyit, Natun ta'imonomo tafaramamaim iyun re it isat. Saise i biyanamaim it yawas tatab. ¹⁰Yabow ana'itininaban i nati, it men God taiyabuw. Baise God it iyabuwit Natun ta'imonomo iyun re, saise ine it ata bowabow kakafih God notawiyen. ¹¹Are au ofonah, God ana yabow iti na'atube iyabuwit, imih it auman taituwat bairi tatiyabowbonen. ¹²Orot men yait ta God itinih, baise taituwat bairi tanabiyabowbonen na'at, God boro wanawanatamaim bairit tanama. Naatu i ana yabow boro wanawanatamaim nara'at.

¹³Taso'ob it i God wanawanatamaim ema'am, anayabin Anun Kakafiyin it itit. ¹⁴Naatu iti Anun Kakafiyin naniyan i tatam sabuw afa hai tur ta'o'owen, Tamat i Natun iyun re tafaram ana baiyawasenayan matar. ¹⁵Orot yait eo'orereb Jesu i God Natun, nati orot boro God hairi hinita'imon. ¹⁶Isan imih it taso'ob God ana yabow isat ebobotan i tabitumitum. God i yabow wairafin, orot yait yabowamaim ema'am, nati orot wanawanamaim God ema'am, naatu God wanawanamaim i orot ema'am. ¹⁷Yabow ana ef nati na'atube wanawanatamaim nama'am, boro nakusowit tanan Keriso'obe tanamatar, naatu baibatebat ana Veya boro men tanabir. ¹⁸Anababatur yabow wanawanan i men bir ema'am, baise uhewbitan boro bir kakafin nanun nabihir. Anayabin bir i baimakiy isan boro nibibiruwit. Baise yait dogor wanawanan yabow men ema'am o yabow ana ef men iso'ob.

¹⁹God tabiyabuw, anayabin God mat it iyabuwit. ²⁰Orot yait nao, "Ayu God abiyabuw," baise tain tuwan ebifa'ifai, nati orot i baifufuwenayan. Anayabin nati orot taintuwan itih bairi tema'am, baise men i biyabuwih, naatu God men i'itin boro mi'tube niyabuw. ²¹Keriso obaiyunen tur eo tanonowar i iti, "Orot babin yait God ebiyabuw, gewasin tain tuwan auman niyabuwih."

Tafaram Tanawasatan

5 ¹Yait ebitumatum Jesu i Roubininenayan, nati orot i God natun. Naatu orot yait Tamat ebiyabuw natunatur auman boro niyabow.

^v 4.9 Jn 3.16 ^w 4.10 Rom 5.8-10; 1Jn 2.2 ^x 4.12 Jn 1.18 ^y 4.13 2Cor 1.22; 1Jn 3.24

^z 4.21 Mak 12.29-31 ^a 5.1 1Jn 4.15

²Ef iti na'atube tasisinaf it boro tanaso'ob, it God taiyabuw ana ofafar tabobosiyasiyar, imih i natunatun tabiyabuwih. ³^bNaatu ata yabow God tabitin, anayabin i ana ofafar tabobosiyasiyar imih i ana ofafar boro men isat hinafokaramih. ⁴Naatu yait God natunamih baib i boro tafaram ana kakafin nawasatan. Imih Jesu tebitumitum anamaramaim tafaram ana kakafin tawasatan Satan umanane taikisisirit tatit. ⁵Imih yait boro tafaram ana kakafin nawasatan? Orot yait ebitumatum Jesu i God Natun? I boro tafaram nigegeisair Satan umanane nikisisir natit.

Jesu Keriso Ana Koubuna'ayah

⁶^cIti orot Jesu i taiyuwin na i'obaiyt i God Natun ana Roubininenayan. Imih Jesu bapataito baib ana maramaim, God i'obaiyt ta'itin. Naatu morob ana rara suwa re'er ana maramaim auman. Naatu Anun Kakafiyin sif rurubon i turobe. Anayabin Anun Kakafiyin i men baifufuwenayan. ⁷Naatu iti sawar tounu i Jesu isan sif tirurubon. ⁸^dNati sawar i Anun Kakafiyin, hawew, naatu rara, nah tounu hai tur i ta'imon sif hirubon. ⁹^eOrot tafaram hai sawar isah sif erurubon i tabitumatum, baise God ana sif rurubon i fair kwanekwan, anayabin God sif rurubon i Natun Jesu Keriso isan sif rubon tanowar, Jesu i God Natun. ¹⁰Imih orot yait God natun ebitumatum abisa God eo sif rurubon i dogoronamaim ema'am. Baise orot yait God eo men ebitumatum, nati orot iwa'an God baifuwenayan matar. Anayabin God Natun isan eo sif rurubon men ebitumatum. ¹¹God kukurereb i yawas wanatowan itit. Naatu iti yawas an i Natun wanawanamaim ema'am. ¹²^fImih orot yait God Natun nabaib yawas boro nab. Baise orot yait God Natun men nabaib yawas boro men nab.

Yawas Wanatowan

¹³^hAyu iti sawar kwa iyab God Natun kwabitumitum isa akikirum kwana'itin, saise kwanaso'ob, kwa i yawas wanatowan kwabai. ¹⁴ⁱImih God nanamaim boro koufair tanab, abisa isan i ana kokomaim tabifefeyan boro nanowar. ¹⁵Mar etei isan tafefeyan i enonowar, nati i anababatur taso'ob, naatu abisa isan tabifefeyan ebitit auman taso'ob. ¹⁶^jTaituwa bowabow kakafin sinaf kui'itin i boro men nan morob wan nayan, gewasin God isan kwanifefeyan yawas nitin maiye. Baise bowabow kakafin ta i boro nabonawiy morob wan kwanayan. Naatu ayu i men sabuw nati bowabow kakafin hisinaf hin morob wan hiyey isah yoyobanamih ao. ¹⁷Ef kakafih tasisinaf etei i bowabow kakafih. Baise i wanawanahimaim bowabow kakafin ta boro men nanawiy inan morob wan inayenamih.

^b 5.3 Jn 14.15, 23-24 ^c 5.6 Jn 1.29-34 ^d 5.8 Jn 15.26 ^e 5.9 Jn 5.32-37 ^f 5.10 Jn 5.36-40 ^g 5.12 Jn 3.36 ^h 5.13 Jn 20.31 ⁱ 5.14 Jn 14.13-14; 1Jn 3.21-22 ^j 5.16 Mat 12.31

¹⁸ ^kTaso'ob orot yait God natun boro men mar etei nama bowabow kakafin nasinafumih. Anayabin God Natun mar etei etatafatar, imih Demon Mowan boro men ni'afiyimih. ¹⁹Tafaram tutufin etei i Demon ebi'aiwob. Baise taso'ob it i God nowan. ²⁰God Natun na, God anababatun isan bi'obaiyt i taso'ob. Naatu God anababatun wanawananamaim tama'am. Natun Jesu Keriso auman wanawananamaim iti God i turobe yawas wanatowan ma'ama'anin, imih ibasit bairit wanatowan tama'am.

²¹Natunatu taiyuw kwanatafafari, god baifufuwenayah hinanan kwanahaiwih.

^k 5.18 1Jn 3.9